

**Anwar Letak Syarat Pilihan Raya Serentak
mStar Online
Mac 28, 2012
Oleh ARIFFUDDIN ISHAK**

KUALA LUMPUR: Jaminan pilihan raya bersih dan adil akan mempengaruhi keputusan bagi empat negeri yang ditadbir pembangkang sama ada mahu mengadakan pilihan raya peringkat Dewan Undangan Negeri (DUN)serentak dengan Parlimen atau sebaliknya.

Ketua Pembangkang, Datuk Seri Anwar Ibrahim berkata, pertimbangan syarat berkenaan bergantung kepada komitmen yang diberikan Suruhanjaya Pilihan Raya (SPR) serta jaminan kerajaan bagi memastikan pilihan raya bersih dan adil dilaksanakan.

Tegasnya, isu utama yang dibangkitkan pembangkang ialah mengenai pembersihan nama 'pemilih ragu' dalam daftar pemilih SPR.

"Isu utama yang dibincangkan ialah mengenai proses pilihan raya dan sekarang kita ada cukup bukti dan fakta untuk menyokong dakwaan pilihan raya tidak bersih.

"Itu adalah isu yang akan mempengaruhi keputusan kami terutamanya di beberapa buah negeri," katanya pada sidang media selepasmempengerusikan mesyuarat Pakatan Rakyat di bangunan Parlimen di sini, Rabu.

Bagaimanapun Anwar yang juga Ketua Umum Parti Keadilan Rakyat (PKR) berkata pilihan sama ada empat negeri pembangkang iaitu Selangor, Kelantan, Kedah dan Pulau Pinang untuk mengadakan pilihan raya serentak sekiranya Parlimen dibubarkan masih diperingkat perbincangan.

"Sama ada nak buat (pilihan raya) bersama-sama atau tidak...pilihan ini masih terbuka.

"Kita masih bincang dengan negeri-negeri mengenai perkara ini...ada yang berpandangan kita patut adakan berserentak dan ada yang tidak.

"Kita perlu bincang lagi...belum ada keputusan lagi," katanya.

Hakcipta Terpelihara © 1995-2012 Star Publications (Malaysia) Bhd
Source:

http://mstar.com.my/berita/cerita.asp?file=/2012/3/28/mstar_berita/20120328171456&sec=mstar_berita